

PM: Amal kesederhanaan, elak salah tafsir konsep jihad
Free Malaysia Today
Okt 1, 2016

Najib berkata, ancaman dalang dalam negara yang ingin menjatuhkan kerajaan pilihan rakyat ialah angkara damak dan racun orang asing serta penjajahan bentuk baharu.

KUALA LUMPUR: Datuk Seri Najib Razak mahu umat Islam di negara ini terus mengamalkan prinsip wasatiyyah atau kesederhanaan dan berwaspada daripada terjerumus ke kancah salah tafsir konsep jihad.

Perdana menteri berkata, dengan berpegang kepada hukum-hakam Islam yang betul dan syumul, mereka tidak akan menyimpang daripada landasan benar.

“...apatah lagi terperangkap dalam fahaman atau ideologi terlalu ekstrem seperti yang diperlihatkan kumpulan pengganas IS, dan tidak pula terlalu liberal,” katanya dalam perutusan sempena sambutan Maal Hijrah 1438H bertema ‘Ukhuwah Islamiah Asas Penyatuan Ummah’ malam ini.

Najib turut mengingatkan rakyat mengenai bahaya tindakan pihak tertentu menyemai bibit perpecahan di negara ini.

“Kita perlu menjauhi segala anasir yang mencetuskan perpecahan, termasuk ancaman dalang dalam negara yang ingin menjatuhkan kerajaan dipilih secara tidak demokratik.

“Ini semua dek angkara damak dan racun orang asing serta penjajahan bentuk baharu,” katanya.

Dalam perutusan itu, Najib turut mengajak masyarakat Islam merenung sejenak di mana letaknya mereka sebagai satu umat.

Beliau bertanya jika umat Islam kini ialah golongan yang dihormati kerana ilmu, akhlak dan tamadun seperti waktu dahulu atau kian disalah ertikan sebagai puak pelampau dan pengganas daripada perspektif salah.

Bagi Malaysia, katanya, Umno melalui pemerintahan Barisan Nasional hampir 6 dekad berjaya mengangkat syiar dan pengamalan Islam ke tahap dibanggakan.

Najib yang juga Menteri Kewangan menarik perhatian Malaysia kini dijadikan negara Islam contoh yang maju lagi progresif di seluruh dunia.

Beliau merujuk laporan 'State of the Global Islamic Economy 2015/2016' oleh Thomson Reuters yang meletakkan Malaysia di tangga pertama daripada senarai 73 negara di dunia.

Katanya, Malaysia juga merupakan penerbit sukuk terbesar dunia merangkumi hampir 55% daripada jumlah sukuk terkumpul global bernilai lebih AS\$320 bilion setakat penghujung 2015.

Malah, hasil laporan kali pertama selepas Indeks Syariah dilancarkan pada 2015, Malaysia memperoleh skor keseluruhan dalam pelbagai bidang melebihi 75%.

"Namun, kita sedar masih banyak ruang dan ikhtiar yang boleh dilakukan dalam memenuhi agenda umat Islam kini termasuk memperkukuh kebersatuan umat, menguasai ilmu pengetahuan dan kemahiran terkini serta memperkasa ekonomi," katanya.

Najib berkata, paling penting umat Islam di Malaysia perlu terus diperkasa ke arah melahirkan generasi yang Islamik dan golongan mudanya dapat bergelar 'Ulul Albab'.

"Dalam kata lain, generasi yang dinamik, berdaya saing, berdaya maju dan penuh nilai keunggulan ke arah menyegar dan mengembalikan tamadun Islam," katanya.

Perdana menteri seterusnya mahu Malaysia terus diperteladan sebagai negara Islam contoh daripada segenap sudut, termasuk ekonomi, siasah dan masyarakatnya.

"Menuju ke hadapan, umat Islam dan rakyat Malaysia perlu melakukan transformasi dan anjakan paradigma, sentiasa mengamalkan budaya ketekunan, berdisiplin serta sistematik dalam menjalankan tugas dan amanah dalam menghadapi liku serta cabaran mendatang," katanya.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/10/01/pm-amal-kesederhanaan-elak-salah-tafsir-konsep-jihad/>